

摘藻堂四庫全書薈要

史部

欽定四庫全書薈要

史部

硃批諭旨卷二百十四之二

詳校官編修臣繆晉

欽定四庫全書薈要卷八千二百一

史部

硃批諭旨卷二百十四之二

硃批郝玉麟奏摺

雍正七年二月初四日雲南提督臣郝玉麟謹

奏為微臣瞻

天念切恭請

陛見以伸孺慕事竊臣碌碌庸材毫無知識蒙

皇上畀以提督重任屢沐

殊恩涓埃未報屢請

陞見未蒙

俞允臣又何敢再瀆惟是臣受

恩獨深與衆不同天下大小臣工無不得覲

龍光臣從未況首

闕廷瞻

天仰

聖且臣更有面奏之事午夜思維寸心如結今口外地

方安靜無事滇黔軍務俱已告竣檄攬壩逆夷督
臣鄂爾泰指授方畧臣統師親往勦撫已經底定
督臣欽遵

聖旨現今赴黔與廣西撫臣金鉷會商地方事宜四月
間可以還滇即將來或有公務他出亦在冬季時
候臣籲

聖慈俯鑒愚忱准臣候督臣自黔回滇之日臣即輕騎
赴京恭聆

訓示俾臣孺慕之私得以稍慰而封疆職守更得有所
遵循矣臣不勝激切屏營之至伏乞

睿鑒謹

奏

朕從未見汝面數年來披覽所奏章疏及所辦事件即
可知悉汝之居心為人汝縱遠在滇南一切處觀朕用
人行政亦可領會朕訓誨臣工之意我君臣雖未會晤
如見面然也今用卿為廣東總督可速束裝赴任到粵

料理一二年周悉地方情形之後再來面朕亦不為遲
旨已宣降卿其遵奉毋違朕現今訓卿之旨惟務不欺
不隱秉公執正旗人習氣操守一節切須砥礪察吏貴
於嚴明不懈臨民須宜寬猛兼施而粵省要務弭盜之
方更宜急為講求汝即來京聆朕面諭亦不出此數語
其竭力加勉一一遵循至於地方上應興應革事宜朕
實不敢強為知解蓋自朕御極後所用粵省督撫率皆
平常供職之輩縱有道聽途說衆論朕尚未之見信何

以諭汝大抵各省風氣雖有不同撫治異宜然究其要
領總在察吏安民凡事順情得理而已如鄂爾泰者可
以之為師範既與同事數年自必洞悉其心行朕所喜
者此等大臣若能效法一分即為能遵朕訓一分也汝
當量已才力倘不能效法鄂爾泰其次寧可倣李衛之
實心任勞任怨慎毋蹈潔已沽名欺詐不實之陋習今
將朕之意指明白宣示以便汝詳擇審處而為之若慮
封疆職分中事或有未諳仍當虛衷領教鄂爾泰保伊

必推誠告汝果肯聽其所言奮勉思齊殊勝來京往返
萬里聆朕訓諭也勉之勉之不盡之諭俟汝到任後隨
事隨便再為批示以增益汝之不逮特諭

雍正七年六月十二日廣東總督臣郝玉麟謹

奏為欽奉

聖訓事竊臣仰荷

天恩畀以廣東總督重任雍正七年四月二十四日准
雲貴廣西督臣鄂爾泰咨移部文到臣隨交代

明白即於五月初二日自大理府起程已經恭疏
題報在案初九日行至廣通縣地方據臣齎摺把總
捧到

硃批諭旨臣恭迎至寓跪讀

聖訓勉以東省政務之要指示居官取法之資

天語周詳至明至切感激

殊恩不禁淚下伏念臣一介武夫仰蒙

天恩授以總督重任自念知識短淺不知作何辦理旋

即欽奉

訓旨頓啓愚蒙不惟知所遵循且覺心膽亦壯所有地

凡事

方事務應行應革之處容臣到任後熟審情○形○詳○
不可求速熟審詳察甚是然亦不可因循徒致蹉

跲歲

加訪察總期安妥不敢矯激以沽名亦不敢瞻顧
月惟當循序次第整理量力而後措施得人而後

委用

而避怨統容次第請
不得其人寧緩事以待往往用人不當好事反成

旨遵行

至旗人習氣操守我

過舉

行政譬如調絃緩急不可此微失當何可預立不

皇上洞鑒

無遺臣受

必更

張必欲更張及寬嚴遲速之意見耶隨事隨地因

恩深重迥異尋常午夜自思益當砥礪若有陽奉陰違

時制宜百凡不論其繁簡難易但論其應否行止事事

不獨上負

能以公忠誠敬告

高厚抑且有累

天而行自蒙

聖明委用之至意其罪更不容逭臣雖至愚決不敢有

上蒼鑒佑成全也勉之

負

聖恩督臣鄂爾泰公忠體

國精勤任事臣與同事數年知之最切其居心制行

實可以為師範臣雖自量才力萬不能及然務當

彼大夫兮我大夫亟當奮勉效法

虛心請教奮勉力行至於督臣李衛實心辦事任

勞任怨幸逢

聖主明並日月洞鑒其誠諸務得以就理實臣下分所
當為臣願竭力效法以盡臣職斷不敢效潔已沽
譽存私欺詐之輩自取罪譴也所有奉到

聖訓臣欽遵緣由繕摺回

奏伏乞

皇上睿鑒謹

奏

從來閩地最稱難治而浙省較為尤難此乃人所共知者幸得一李衛實心任事之督臣未及二年氣象遂覺翕然丕變汝等督撫之有關於地方利害也如是不敬不畏可乎切勿以封疆任重為榮惟實知盡職之難統屬之苦方能上邀

神明助祐若朕則實知為君之難居上之苦孜孜矻矻自勉力行者至於貴為天子富有四海朕實不覺尊高可喜而有暢心適志之樂也朕向在藩邸數十年仰賴

皇考福蔭富貴榮耀不減今日而安享逸豫不及當時百
千萬倍言及此不禁涕泗交垂慟憶我

皇考昊天罔極之深恩云爾偶因一時感觸書諭我君臣
期共勉之

同日又

奏為恭懇

聖恩事竊照廣東地方山海交錯弭盜一事最為緊要

臣
跪讀

硃批訓旨仰見

皇上明同日月無遠勿照臣思弭盜安民首在地方文
官稽查化誨清其源流更須武弁整飭營務嚴謹
汛防實心拏賊使盜賊知所儆懼地方始得寧謐
百姓始得安枕是文武各員全在得人臣猥以庸
愚荷蒙

皇恩畀以總督重寄查廣東地方遼闊臣一人耳目難
周須得素所深知諳練才幹文武能員以備委用

庶可漸次整頓臣欽遵

聖旨兼程於六月初五日到黔省貴陽府將廣東地方
應行整理諸務備細與督臣鄂爾泰相商督臣推
誠講論悉心指示莫不深切體要又云聞東省諸
事廢弛盜案尤多須揀擇幹練文武數員散布分
理始有裨益等語臣聞督臣所論即與商酌擬將
臣平日所知如貴州威寧府知府吳士鯤雲南開
化府同知楊正輔劍川州知州李毓元石屏州已

告終養知州龍為霖皆才守兼優勇於有為懇祈
聖恩特降諭旨調用粵東俾臣得收指臂之效鄂爾泰
知臣新任未諳亦並無難詞臣為此籲求

聖恩特降諭旨賞將以上文員調赴廣東令臣遇缺具
題請

旨補用於地方政事大有裨益至營伍諸務在在俱屬
緊要臣擬將雲南維西營叅將李君賢楚姚鎮遊
擊朱永振順雲營守備題補臨元鎮遊擊魏傑武

定營守備王廷標永北鎮千總邱尚忠張朝翰楚
姚鎮千總陳宏舉馮希聖提標把總梁汝楫俱久
歷行間出師西藏并米貼茶山著有勞績且皆係
實心任事之員堪供驅策并求

聖恩調赴廣東遇缺

題補則臣得收指臂之效海疆營伍漸次整頓矣臣
為新任地方起見謹繕摺請

旨伏乞

皇上睿鑒施行謹

奏

照爾所請已有旨諭部矣朕勉從所請一者因汝初理
地方事務二者念雲貴各員曾經鄂爾泰鼓舞訓飭必
已知為人居官之道所以姑准施行雖然題帶舊屬往
赴新任究非善舉定於汝無益將來或至掣肘時方悟
朕言之不謬也自古知人為難人心難測事事時留
心體察方不被其愚惑萬不可過信亦不可不信人皆

可信何必止信數人耶信任者多得力處廣信任者少
得力亦微美惡不可預期是非不可逆料秉公據理平
心看去有何可信何不可信耶凡人且用去看其所行
是矣從而加意察訪其志堅定否他事亦然否事事皆
是矣更觀其有無矯情能長久如是否終始不渝否如
此觀人則優者愈見其是而劣者愈見其非假若預橫
成見於胸中則是者不出此一是而非者定於此一非
矣倘是者或有巧詐之情而不加察則誤已不淺非者

或有遷改之實而不更審則寬人殊甚總之知人不易用人尤難若不費一番苦心公取捨勤訪察耳目不廣精神不到莫言知人用人之道也勉之治平之術除用人一節餘無二事如得其人斯諸務就理不得其人堯舜之政自在簡策於吏治民生何濟汝其欽承朕訓盡屏私腸於信人用人之際毋任一己之喜怒好惡惟恪秉公勤誠敬而為之可也

雍正七年八月十一日廣東總督臣郝玉麟謹

奏恭請

皇上聖安

朕安

覽卿到任後一切奏請及所辦理甚為嘉悅卿之立志是矣根本既端枝葉夫何足慮朕深慶粵督得人勉之勉之堅守此志毋稍遷移時時記憶鄂爾泰之居心行事常存彼丈夫兮我丈夫之念則為粵省官民之福亦朕之厚幸也

同日又

奏為奏

聞事竊臣查粵東各府州屬本年閏七月內雨水均屬調勻晚禾蒔插已遍現在發秀各屬米價上米每

米糧

石自八錢起至一兩不等中米自七錢至八錢五

價平實為可慶之事朕懷深慰

六分不等下米自五錢五分起至七錢五六分不

等再閏七月初九日風雨晝夜被風地方民間屋瓦吹飄路傍營房望樓亦多倒塌其人口田禾各

無損傷訪諸土人僉稱廣省地臨濱海每年當夏
秋之間海風不時舉發等語除檄行該管地方文
武查修完固外理合一並具摺奏

聞謹

奏

粵省濱海居民每有吹飄之患但看海風舉發之大小
不同耳查明被災輕重加意撫恤之

同日又

奏為奏

聞事竊臣欽奉

諭旨郝玉麟到廣東新任後著孔毓珣將地方事宜及
鹽務等項明白交代與郝玉麟協同辦理半月來京
陛見欽此臣於到任後凡地方事宜俱與前督臣孔
毓珣商酌協同辦理所有鹽務一事隨即咨詢將
任內督辦過數目以及正羨課稅支解完欠造冊
移交以便查明接管去後當准孔毓珣移送運司

造報冊結前來臣細加查核兩廣鹽務因發帑收
鹽銷辦是以有羨餘一項今將孔毓珣任內各年
收過鹽斤彙總合算自孔毓珣到任起扣至本年
六月計其辦出之鹽應賣之價扣除帑本運腳支
銷之外其餘止足六年以前報出之羨餘其自本
年正月至六月應辦羨餘二萬有奇竟無著落隨
咨孔毓珣詢其原委去後續准覆稱羨餘一項雖
係按年奏報原係截長補短不能扣截而計隨將

各官商竈戶未完自康熙六十年起至本年六月止一切積欠以及現在各場埠已運未運鹽包造冊交臣抵作未完五六兩年以及七年分上半年羨餘之項臣即將所交之冊通盤合計除抵已報未完五六兩年羨餘外餘欠雖足抵七年分上半年應辦羨餘但錢糧自應各歸各款似此前後那抵且又多係遠年積欠將來不知能清完否臣奉諭旨明白交代何敢瞻顧草率遽云明白今據移送抵

款之冊尚須逐一清查而督臣衙門鹽政卷冊零星又多舛互孔毓珣奉有

欽限不便久稽已於本年閏七月二十五日起程赴京
陛見臣將伊所辦鹽務復加查考總緣羨餘一項自報
充公以來雖每年

奏報五萬餘金實非每年會計實數孔毓珣自到任
至今總謂可以截長補短實未計及此年之足與
不足徑行

奏報是以積欠未得清完臣現在細加查核合先據

實奏

聞仰祈

睿鑒謹

奏

查明之後惟以按年辨理據實奏報為是似此那新抵
舊究屬欺瞞之舉切不可踵而行之百凡總以鄂爾泰
之居心行事為模範而倣效之萬無一失也謹誌毋忽

同日又

奏為敬陳兩廣鹽政之流弊仰祈

睿鑒事竊臣仰蒙

皇上殊恩特授廣東總督任大責重夙夜惶懼除地方事宜以及鹽政交代已另摺奏

聞外臣查兩廣鹽務悉屬臣衙門管理是以前於途次一入廣西境即留心訪察一切鹽政情形到任後復細心體察迄今已及一月雖未能周知而其中

之因循流弊但有所知敢不一一奏

聞一遠年之積引與新引並行以致誤課難徵也一商人之掛欠鹽價以致帑本久懸不清也一廣西省辦商之糜費火足宜節省也一鹽務人役之冗濫糜費帑本也一東省官運官銷之埠羨餘未清也一場羨不據實

奏報逐年牽互不清也一竈戶晒丁之走私宜設法也一地方官宜督責鼓勵也以上八條實兩廣鹽

政因循之流弊臣現在清理斟酌調劑其餘未盡
事宜以及臣尚未週知之利弊亦在悉心體察次
第陳

奏斷不敢避怨依違臣見雲南鹽政自督臣鄂爾泰
李衛前後一番清理調劑至今官民商竈無不稱
便臣敢不虛心取法以冀仰報

皇上殊恩於萬一謹此繕摺奏

聞仰祈

睿鑒謹

奏

閱所陳八條內有應行者亦有暫時似乎有益日久難行者即如節省辦商糜費一款宜加斟酌勿因一時除弊之見或致將來不能承辦復費經營朕意汝到任未久且守成規辦理不可造次更張俟將鹽務一切利弊洞曉無疑之後再為詳商妥議奏聞候朕批示遵行凡事不宜欲速次第整理自能就緒至若鄂爾泰李衛之

調劑得宜皆因胸中先有徹始徹終之定見然後措施所以能收成效非僥倖試行而然也倘於其中利弊少有未透不可聽信一二無稽之論遂爾輕議更改恐有急遽之失特諭

廣東總督臣郝玉麟署巡撫臣傅泰謹

奏為請

旨事案據廣東碣石鎮呈據中營守備林駿詳稱雍正七年七月十九日夜四更時候惠州府海豐縣梅

隴墟舖民徐秉閑等家被盜百餘人明火持械搶劫各舖布疋銀錢等物鄉民潘朝柱救護被賊傷死等情又據署海豐縣會同汛弁驗報前來經前督臣孔毓珣及臣等俱各星即照行碣石鎮按察司飛檄該地方文武多撥弁兵練捕速往躡緝務必全獲去後隨據提標右營守備哈雲棟報稱查得打劫梅隴墟舖民徐秉閑等各家賊犯兵弁練捕追至長樂縣山羊寨地方於閏七月十五日據

賊犯謝恩榮等開報同夥姓名共一百二十三人
各繳器械一同投首前來隨會同歸善縣縣丞謝
進分起押解賊犯謝恩榮等到肇內除夥犯一名
鍾恩趙據報病故外臣郝玉麟當即飛調惠州府
會同肇慶府審取確供去後隨據該府等會訊錄
供詳報前來臣等將供情細加檢閱會看得海豐
縣梅隴墟舖民徐秉閑等家被劫一案緣廣西賀
縣人謝恩榮先與長樂縣居住之張永良余大榮

等希圖在山宅礦淘沙度日從前並無劫掠搶奪

等事後謝恩榮等到山不久即被驅逐各人先後

下山無處覓食於七月十七日謝恩榮在烟墩墟

撞遇張永良余大榮等各道貧苦當有黃天明說

打聽梅隴墟舖家有銀錢布疋好去搶劫張永良

即與余大榮等商定向謝恩榮說知脅從衆人即

於七月十九日夜三更時候到梅隴墟搶劫徐秉

閑等家市舖劫得銀錢布疋等物謝恩榮張永良

余大榮黃天明陳友華徐世英曾文張文興石漢

臣鍾文材黃雲黃興繆標文等俱各加倍分贓袁

文等十一人各分一分各犯刦後遂即遠逸而墟

中居民救護窮追盜犯王亞貴張亞石江松林彩

等在後拒捕傷死救護鄉民潘朝柱而王亞貴張

亞石當被鄉民殺死此案為首兇犯係謝恩榮起

意嚮導係黃天明先行商酌係張永良同商行刦

係余大榮陳友華徐世英曾文張文興石漢臣鍾

丈材黃雲黃興繆標文等與拒捕傷人之江松林
彩共一十五名此皆法無可貸不准自首相應仰
請

皇上敕下即將盜犯謝恩榮等一十五名發往被刦地
方當衆正法以警姦頑再謝恩榮一犯勸衆投首
應否網開一線量予末減出自

聖恩至袁文等各犯共七十一人因驅逐散後又被脅
從入夥並非積盜既據投首情有可原可否准予

自新照例分發當差效力統候

審裁再李才等三十六人原未入夥為盜又未分受贓物俱係平民臣等先即檄行摘釋剗去贓物應於各盜名下追賠除將謝恩榮等檄行按察司嚴行收禁外臣等未敢擅便理應會摺請

旨伏乞

皇上睿鑒批示遵行謹

奏

已發三法司核擬具奏矣此案聞兵弁於追捕時甚為
怯懦當嚴行飭誡

雍正七年九月十一日廣東總督臣郝玉麟謹

奏為粵省買補營馬領銀浮多宜定成規以杜冒銷
事竊臣查得營制定例副將以下把總以上以及
馬戰守兵均有朋扣銀兩收貯司庫以備操馬倒
缺請領買補不致偏累馬兵法至善也然營有大
小兵有多寡及所設營馬亦多寡不一報倒請朋

原係照所朋扣量入為出總不浮出朋銀之外操馬已過三年者始准報倒未滿三年者扣除賠椿蓋杜捏報冒銷此天下通例也臣查

奏銷冊開雍正六年分通省水陸各營共計朋扣銀兩三萬七千八百二十兩零查水師雖無操馬亦係一例朋扣至通共計經制營馬六千二百四十八匹自應按年報倒照扣領朋始與定例相符查六年分報過倒馬竟至一千五百一十一匹之多

動支朋銀三萬三千九十兩零下剩溢朋僅存四千七百三十兩零各營支領朋銀不但透支陸路朋扣暨水師朋銀又已動支且通省報倒馬匹並不畫一又不計算每年各營共有朋扣若干應報倒馬若干以符朋扣之數每年通省標營共計多領朋銀六千七百七十三兩實屬冒濫所有七年分倒馬未便聽其浮報臣今酌減每年通省額定報倒營馬一千九十四匹實動支朋扣銀二萬三

千九百五十八兩將來盈縮總不得浮出本營朋扣銀兩之外查水師各營原扣朋銀六千七百四十一兩零臣思水師朋銀雖無買馬之用而行駛船隻每年大修小修概係動用帑金自應將此銀兩歸公不便聽其冒領再查從前浮開冒領匪朝伊夕其來已久應否概從寬典出自

聖恩其水師朋銀暨今核減除椿銀不算外計七年分約溢剩朋銀一萬四千七百餘兩零均應留充兵

餉庶各營冒銷之弊可以永杜矣所有粵省浮開
倒馬流弊應行酌減之處臣謹據實奏

聞伏乞

皇上睿鑒批示遵行謹

奏

卿秉公持正毫無瞻顧甚屬可嘉但甫經到任諸事須
務詳慎令閩省兵弁心悅誠服後為之未為晚也

同日又

奏為挈獲海洋巨盜事竊查粵東廣州府屬之香山

廣海新會聯界地方傍海依山最易藏姦臣於到

任後即嚴檄該管水陸營汛無分疆界上緊查挈

去後本年八月十二日據新會營遊擊周廣詳稱

查有賊夥在廣海石橋北坑地方會集豎旗勒取

繒罟船隻花紅銀兩隨差督標俸滿千總楊志望

外委千總譚仲賞外委把總薛英各帶管隊兵丁

鄭兆勝等配駕哨船於八月初六日巡至香山三

虎海面見有賊船七隻約共賊徒六十餘人在海
游移一見官兵追到賊即拒捕千總等督兵奮勇
向前擒拏追至廣海獨涯清水灣海面拏獲賊首
李奕揚夥賊楊亞干等共二十六名其餘賊犯當
被官兵殺死二名打傷落水身死二十餘名赴水
脫逃一十餘名打壞賊船一隻沉海漂流一隻並
獲賊船五隻追出器械並賊銀賬簿書劄標帖等
項委令守備涂元漢等押解賊犯李奕揚等到肇

臣即親加審訊取供在案一面將賊犯李奕揚等并贓械賬簿書劄標帖等項發交按察司嚴行究審並一面飛檄該管地方文武選撥弁兵員役會同水師速將李奕揚餘黨暨脫逃之首盜王亞七等並供出之陳大樂等一夥賊犯分往確探逃匿蹤跡潛泊處所立即搜捕務獲解究去後又據遊擊周廣報稱續經拏獲與賊往來之東山寺僧茨亭一名賊黨鄧亨齊等四名又報拏獲賊黨劉自

雄等三名俱行詳解前來臣俱檄司一并究審除俟夥賊全獲審擬招報到日另行會核將賊犯李奕揚等

題請正法外其臣標千總楊志望等并管隊兵丁鄭兆勝等俱奮不顧身勇敢拏賊實心效力殊屬可嘉臣即按名賞給彩緇銀牌并紀勞績以示鼓勵事關海洋近日情形合將現在拏獲洋盜緣由先行繕摺奏

聞謹

奏

此案非尋常獲盜可比該督具題到日將兵弁人等該部照軍功例議敘具奏

粵省惟弭盜一事最為要務此奏朕嘉悅覽之已諭部矣但賊夥會集幾多時日未經聲明可詳悉審訊具奏以聞

同日又

奏為

聖主之德澤日深商等之沾恩已厚請增餉課以效涓埃事竊臣於到任後即清理鹽政議增引目以資民食隨據各商等呈稱實緣雍正三四兩年雨水過多場鹽少產以致元二三四等年引目壅積未銷且廣東埤地在在難銷唯藉連樂等數埤稍易銷售通融撥抵以資課餉今若再增引目不獨舊引終成壅積即新引亦必更多延誤該商等蒙

皇上發帑養竈久沐

恩膏情願按引增課每年加增六萬兩并請照舊融銷
分年帶拆舊引前來臣即批仰運司確查妥議詳
報去後續據議詳到臣復細加查核該商等未
拆元二三四各年舊引實俱完過課餉因三四兩
年雨水過多場鹽少產壅積未拆有案可查並非
他省已拆已銷之未繳殘引可比但其中亦有完
課舊商已退新商實非當日完課之人不便准其

再拆臣查元二三四等年共未拆引三十七萬六千五百道內完課舊商久已告退之引六萬四千八百六十九道不准頂充新商拆銷外尚有完課未拆引三十一萬一千六百三十一道應請每年帶銷十萬三千八百七十七道定限三年為滿仍懇

皇上俯准難易埤地一例融銷其該商等所請先增餉課六萬兩并懇

皇仁准於本年十月行銷七年新引為始每年隨課上
納報部充餉俟三年帶銷限滿無論舊引完與不
完一概停止專行新引再將此所增六萬兩課銀
同以後或再有應增之項一併請增引目永為歲
額則

國計商民均沾裨益矣為此繕摺請

旨伏乞

皇上睿鑒批示施行謹

奏

所奏據怡親王議覆朕深以為然今將議覆之摺發來
爾看可即照行將來至增繳新舊引目之時具疏題請
可也

同日又

奏為查出東省官運官銷之埠羨以裕課餉事竊臣
查得粵東各埠雖皆商辦內有廣州府屬之順德
等埠因商力不繼久經改歸官運官銷則應有埠

羨歸公臣隨飭現任順德縣知縣柴瑋據實開報
去後續據造具印冊前來臣復逐一核查每年實
該羨餘銀二千二百二十七兩該縣俱未報解查
該縣承辦五六兩年共該羨餘銀四千四百五十
四兩並不報解本應叅究但實係歷來因循流弊
而該縣一經查詰即行開出自認補解且其人年
力精強正堪效力臣仰體

皇上愛惜人材至意細加戒飭立限半年令其照數補

解嗣後每年埤羨銀二千二百二十七兩飭同正課起解歸入埤羨項下充公在案可否寬其已往冀其後效出自

聖恩再查該埤自雍正二年即改歸官辦係前任知縣今陞韶州府現在丁憂知府陳鴻熙承辦每年亦實該羨餘銀二千二百二十七兩該府自二年三月到任至五年八月離任四年共得羨餘銀八千九百八兩查該府會於陞任後透完過二三四

課餉之未折引二千六百餘道共計銀一千九百六十六兩外尚有羨銀六千九百四十二兩未報未解相應勒限一年令其補解如逾限不完即具題叅革究追再饒平一埠係五年分改歸官銷每年應有羨銀五百九十九兩該縣知縣董鍾晉承辦五六兩年引課共該羨餘銀一千一百九十八兩不報不解本應叅追總緣流弊相仍可否仰邀寬

典出自

皇仁其應追羨銀臣已勒限半年令其補解清完嗣後

每年應辦羨銀飭同正課起解歸入埠羨項下充

公再查平遠長樂恩平三埠亦自五年分經前督

臣孔毓珣因商力不繼飭令官運官銷以來緣平

遠一埠引多課重而長樂恩平二埠逼近場地俱

不能照額行銷是以將已銷之引所有羨餘即抵

補應完之課而羨出之引不能於該埠再銷只可

陸續酌撥於易銷之埠逐漸融銷查三埠餘引共

二萬四千八百三十七道若融銷完日則此項引課即係平遠等三埠羨餘容臣設法銷完歸入埠羨項下一併

奏報充公可也所有臣查出東省埠羨緣由合即據實奏

聞仰祈

睿鑒批示遵行謹

奏

此奏交怡親王等會議今將所議發來汝其遵照奉行
埠鹽官運官銷之事曾經備詢孔毓珣珣據伊奏稱因係
難銷地方無人充商承辦不得已改歸官運等語朕意
果如其言縱有些少羨餘亦不當過於苛求何則若地
方可保必有羨餘則不難招商承辦何必改令官運官
銷耶諸凡須詳情度理然後於事有濟稍涉偏執目下
便勉強將就恐不能行之久遠一切處類推為之方無
過不及之失不貽日後之悔也

雍正七年十一月十八日廣東總督臣郝玉麟謹
奏為恭謝

天恩事本年十一月初十日據臣標把總齋捧

皇上硃批并

御賜貂帽哈密瓜克食到肇臣敬迎至署恭設香案望
闕叩頭祇受訖所有臣具奏事件跪讀

諭旨指示精詳容臣悉心辦理次第請

旨遵行外又臣請

安摺內荷蒙

天語垂訓勉勵備至臣自顧何人膺茲

異數感激涕零不能自己惟有凜遵

聖訓堅持此志不敢改移殫竭心力勉效督臣鄂爾泰

之居心行事以仰副我

皇上教誨微臣之至意耳謹具摺恭謝

天恩伏乞

睿鑒謹

奏

覽奏謝知道了

觀汝自莅任以來一切摺奏無非以清楚錢糧為要務
似此不特輕重本末失宜粵省民情惟利是趨亦與地
方輿情甚不相協也果能令吏治潔清民情淳樸徐徐
自有弊絕風清之效若不於根本處著力而逐末辦理
豈但不勝其繁亦何有吏畏民懷之期地方官民之心
既失徒恃國家法度欲令百物順軌乃斷不能之事如

是以為不事瞻顧秉公無私則大誤矣再者粵東各官
分為兩黨恐汝不覺茲特密諭知之兩邊各分門立戶
黨首一為王士俊一即方願瑛方願瑛實屬元惡將來
朕必置之重典伊不過一臬司耳能令通省之人無一
不附合者因被楊文乾叅奏伊嗾使上下各員羣起而
攻之此等刁風萬不可長王士俊乃實心任事明體達
用之員因被楊文乾委用遂為通省之所忌嫉切勿聽
信屬員譖愬誤生疑惑倘錯用耳目則通盤不是矣汝

第倣照楊文乾措施辦理自可望有成效楊文乾之志趣惟王士俊深悉事事與伊商酌斷不至於大差誌之密之

將粵省分為兩黨之由向汝自滇題帶人員密為示知莫被誘入黨中凡遇有代方願瑛訴屈者率係粵東蠱蠹即宜留心相待慎勿謬忽此種情形朕經採聽數年深悉隱微設將諭旨視為疑信之間則自誤不淺

開復新用副將繆宏其人若好則為將來武臣中難得

之員否則乃一不安分大膽狂妄人也朕未能看透汝其留心試用俟有真知灼見時具奏以聞

雷瓊道王璠前於知府任內來京引見朕觀其人頗近庸劣外貌雖似誠實心術尚恐未純因孔毓珣楊文乾皆力言其優所以擢用此任近聞不稱海疆巡道之職當留心察訪至陶正中傳泰盛言其好朕謂不過聰明自了之流未必肯實心為國致身效力也汝其加意試看更將傳泰保奏并朕數次批諭陶正中于其珣如何

之處密向傳泰傳旨令其告汝知之

同日又

奏為敬陳粵東外海內河戰船情形分別小修歲修
以收實效事竊查粵東通省設有水師外海繪船
拖風等船一百六十二隻內河櫓槳急跳等船二
百三十四隻配兵遊巡分班出海一切船隻限年
修理船身堅固駕駛無虞本年四月二十三日准
到部咨奉

旨祖秉衡所奏小修改為歲修甚屬得理著通行有戰

船之地方一體遵行欽此
前督臣孔毓珣接准部咨

當經轉行欽遵在案茲據布政使王士俊詳准水

師各鎮協營均請仍照舊例小修等由到臣該臣

查得粵省戰艦等船有外海內河之分查內河船

隻亦有可以出海者除現檄行布政司分別查明

議詳外其不能出海內河船隻遵照歲修之例修

理實屬妥便惟出海戰船勢難畫一臣查粵東外

海與京口內河水性鹹淡不同且外海風巨浪猛
洪濤衝擊而出洋戰艦易於朽壞是以定例海洋
戰船自新造之年為始歷三年准其小修再歷三
年准其大修再歷三年如船隻尚堪修理仍准其
大修如果朽爛不堪修理保

題拆造與京口沙船歷九年而始大修十六年而後
拆造者又自不同今若照京口沙船之例將小修
改為歲修勻給工料有限歲歲粘補無多新造之

一二年船身堅固工程簡畧尚可足用若至數年之後屢經鹹水浸灌蠹虫蛀蝕雖勤加燂洗而船身不堅釘鏽木腐更換新料則工價不敷照依歲修則粘補無益竊恐未屆大修拆造之期而船已朽壞不堪關係甚鉅仰懇

聖恩俯念粵海不同京口除內河漿哨等船內有不能出海者俟查明若干遵照歲修外所有外海戰船請停歲修准照舊例限年分別小修大修拆造則

船隻得以堅固海疆實有裨益為此據實陳

奏伏祈

睿鑒批示遵行謹

奏

閩廣二省戰船仍照舊例修理已有旨矣

同日又

奏為欽奉

上諭密行辦理事本年九月十五日接到大學士公馬

爾賽等字寄內開雍正七年八月十二日奉

上諭聞得江南福建廣東及浙江之杭嘉湖三府有匪類結黨潛謀為匪其為首者係江寧人各處用銀結納等語外間既有此言不得不為留意爾等可密寄信與郝玉麟令其密密留心整飭營伍預為防範但不可驚惶聲張使屬員弁兵知覺緣由倘致洩漏於事無益徒滋驚擾若江浙有文知會時或有查拏同黨之人即便作速緝拏務使嚴密勿令一人免脫欽

此遵

旨寄信到臣臣跪讀

聖諭當即欽遵密為留意不敢驚惶聲張致有一毫洩漏外布應行之政事內寓防範之機宜整飭營伍勤加操練又與署撫臣傅泰密商於江西福建接壤粵省交界地方遴委親信妥當人員一面借公事名色并往浙省一并密行訪探倘有信息易於辦理若江浙有文知會時或有查拏同黨之人即

行緝拏不致免脫務期姦匪絕迹邊疆寧謐以仰
體

皇上治益求治安益求安之至意所有密行辦理緣由
謹具摺奏

聞伏乞

皇上睿鑒謹

奏

覽奏知道了稽察匪類較之緝盜尤為緊要須不時留

心多方密探方能得其蹤跡非比命盜案件有失主苦
主之證據易於追究庸碌督撫往往畧而不察偶遇一
二敗露者輒諉之曰瘋狂率皆置之不聞不問以為何
必滋事拖累無辜惟隱飾是務所以致令呂留良輩得
以數十年肆行無忌於光天化日之下也切毋蹈此無
知陋習以養癰遺患此等處惟李衛深識輕重他人莫
及而玷職無能之輩反目為多事豈不深可痛恨也乎
粵東地處邊陲風俗欠淳且兼通海洋更易藏姦亟當

再四加意時刻察訪毋忽

同日又

奏為敬覆

諭旨仰祈

睿鑒事竊臣為東省改歸官運官銷順德等埠鹽課羨
餘一項繕摺奏請

聖裁奉到

硃批仰見我

皇上聖諭周詳無微不至臣敢不欽遵悉心籌畫伏查
難銷之埠若官運官銷實有羨餘而又不能招商
辦運者其中實有原委今細為我

皇上陳之查行鹽埠地雖有難易之分而所獲羨餘每
封實約有四五六百金不等埠埠皆然但難銷之
埠或引繁課重或私鹽充斥以致額引不能全銷
而商人頂充必須全納額餉所有已銷過引之羨
餘僅足墊納未銷之引課商人無利可圖是以無

人承充若能設法行銷緝私嚴密銷完額引何嘗
無羨至若官運官銷則不須墊課銷得引一封即
有一封之羨餘且將不能銷之引撥於別埠融銷
完課只就本埠實銷之引完納引課是以實有羨
餘因官運官銷與商人行銷事有不同所以難銷
之埠無商充當也理合據實覆

奏伏乞

睿鑒謹

奏

覽奏已悉

請裁辦商一摺內有交部查議之處留中候旨

雍正七年十二月二十七日廣東總督臣郝玉麟

署巡撫臣傅泰謹

奏為遵

旨查奏事竊臣等蒙

皇上發交條奏一摺奉

旨諭總督郝玉麟巡撫傅泰有人條奏此一摺汝等可

詳查議奏欽此臣等一面欽遵詳加訪察一面諭令

布政司會同糧驛道確查去後茲據該司道呈稱

粵省民田科則原有差等如南海縣每田額銀三

分三釐額米一升三合五勺零計田三十一畝一

分五釐零名為一石糧應共徵銀一兩二分零本

色米四斗二升三合番禺縣每田一畝額銀二分

四釐額米八合三勺九抄計田四十六畝七分二

釐零名為一石糧應共徵銀一兩一錢四分本色
米三斗九升二合其餘州縣徵收額數大概相同
從前州縣徵收錢糧名為加耗一錢四五分實有
一錢七八分不等雍正六年十一月內公同司道
議定每兩加耗一錢六分核實

奏銷刑名飯費另加耗九釐每兩共加耗一錢六分
九釐以為通省公事及各官養廉之用除此之外
州縣並不敢有打號單銀平頭等費如條奏摺稱

每兩竟要加耗三錢一二分方能完納等語實無確據且粵東貿易行使雖有銀錢並用但花戶從無以錢赴櫃納糧者州縣亦未聞有收錢發給串票者又安有納銀一兩至用錢一千五百文之事即本司提取火耗每兩止提七分以為院司養廉并通省公用又除九釐為

奏銷刑名飯費其餘尚存耗銀九分即扣留該州縣應得養廉之數多寡勻給並無有如條奏所稱提

斛一錢七分之處又摺稱官米三斗零三合四勺
要納銀四錢四分二共需銀一兩七錢六七分是
通指銀米而言但糧道衙門每年現收米二十四
萬七千三百三十三石零如摺內云共需銀一兩
七錢六七分是藩司衙門既經收銀又復折米銀
米俱歸藩庫矣從來並無其事再摺稱徵收本色
米每石有徵穀二石七八斗者有徵穀三百餘觔
者每觔足一升計三石有餘亦有使用等費合而

計之每石須銀一兩九錢等語查每年秋冬時將
春夏碾支兵米徵收還倉例應一米二穀州縣現
今照例徵收未有收米一石折穀三石之理目下
米價五六七錢不等如折穀三石合米一石五斗
計銀不過一兩又何用銀一兩九錢之多但糧道
衙門已經收米則摺內所云納官米三斗零三合
四勺納銀四錢四分益屬無據況徵收本色米原
屬支放兵糧查通省各旗標鎮協營寨官兵馬匹

共歲需糧料米五十一萬一千九百八十六石除
不敷糧料米石仍照部定價值折給外其額徵民
屯米石現今州縣收支悉皆本色如云折給兵米
只給銀七錢是亦並無其事也理合據實查覆等
因前來經臣等復加確查無異惟是地方遼濶臣
等耳目難周誠恐各屬尚有陽奉陰違并胥役借
端滋弊復又不時密加訪查如有加耗派費等情
立即叅究務期積弊盡除以仰副

皇上子惠元元之至意再照摺稱本年五月內蘆包汎
漿船被盜搶去并刼棉花客船一隻將鎗礮俱行
帶去等因查此案嵩管把總邱勝宗經前督臣孔
毓珣咨部斥革其船內礮械俱經追回無失至疎
防職名前經會疏

題叅又不行接續協追職名臣等復行會核咨叅在
案合併陳明伏乞

睿鑒謹

奏

知道了條奏各款朕原未盡信必以為然但粵省吏治民風未為帖然就緒汝等極當協衷整理以期後效勉為之

奏為密陳痼弊仰祈

睿鑒以破貪壑以除民害以靖疆圉事竊查廣東各鹽埠勒收乾標縱私擾害一項臣已瀆陳

天聽矣又何庸再為瑣

奏獨是此中之痼弊最深黨固最密非經

審慮斷不能盡絕其根株永使生民樂業濱海肅清
此臣之所以既言於前不忍不再窮底裏於今
日也何則蓋弊之興也易剪弊之積也難除弊
生於民也易治弊成於官也難清始於官流於
官前後相因上下相應是以牢不可破愈久愈
深致有商人辦課當道行鹽之物議伏思煮海
為鹽乃天地自然益國益民之利緣產之者不

盡其地而需之者不遺一家故召商以運之立
埠以聚之又恐徵收無度設引以額之立法亦
盡善矣在承商者循分安業在守土者持法嚴
私何害之有無如利之所在人競趨焉不但市
井之小人先自封疆之大吏倚勢奪埠借帑行
鹽或委之子弟家人或委之親戚朋友而若輩
有恃不恐靡所不為乾標之所由以作而姦宄
之所自以生也一人倡始羣焉效尤迄於今更

有甚焉者矣不惟官可以佔埠即官之幕友親
朋弟男子姪俱可霸埠不惟現任之官有埠即
已經去任之官尚有埠不惟有沿海之標抑且
有過山之票在董理埠務之州縣乾標外又派
丁鹽在不理埠務之州縣規禮外時為苛索遂
其所欲任商打標拂其所好任私四出商人辦
課備價不能拆引當道欠價掛餉可以行鹽再
加以從前張天爵陸曾李續祖等三案之增銷

遂致積引甚多承本年之商辦來年之課拆先
年之引近年雖餉課無虧商民之凋憊已極視
封疆為利藪以敷衍為盡職喪盡天良羣為不
覺誠可悲而可恨也固結如此民何以安臣今
日不言無人肯為我

皇上言矣然此猶就臣所聞見者而言其大畧也尚
祈

聖慈垂照謹繕摺密

奏伏祈

皇上睿鑒施行

頃有人密奏此一摺大抵浮詞無稽持論太過似非公
確之奏但既經朕之耳目豈可置之不問因遇便發來
爾看可將鹽務一切情形了然熟悉後再加確訪據實
奏覆

廣東總督臣郝玉麟謹

奏為遵

旨覆奏事雍正七年閏七月二十七日蒙

皇上頒發密摺一扣為密陳痼弊等事奉有

硃批臣敬謹遵奉殫心確訪迄今鹽務情形稍知梗概
敢一一為我

皇上陳之如密摺內稱商人辦課當道行鹽之物議等
語臣查商人揭本辦課必拆引行銷始能歸本獲
利是以間有引多課重難於行銷無利可獲之埠
即無商肯充不得已而歸官銷辦實並非課係商

辦鹽屬官行之事也又大吏倚勢奪埠借帑行鹽等語臣查督撫藩臬皆為大吏臣到任後即留心密察不獨並無奪埠行鹽即家人吏役亦無倚勢行鹽之事又發乾標等語臣查沿海各埠逼近場地私鹽充斥不能禁遏如新會海豐歸善惠來等處遂有私鹽經過每擔抽錢名為幫餉給發乾標執照以致私販執標橫行影射散賣賺誤引餉臣到任後已嚴行禁飭今復確訪各商凜遵法紀不

敢復蹈前轍矣又幕友親朋霸埠等語臣查幕友現在各衙門幕中辦事俱有關防豈敢出入料理埠務而其親朋或有借名霸佔亦未可定臣再四密訪現在實無其事又州縣苛索陋規等語臣查康熙四十六年以前鹽政衙門固有陋規凡屬行鹽之地道府州縣亦有規例業經前撫臣范時崇兼理鹽政時

題明禁革在案臣到任後恐日久法弛又經通行禁

飭惟清遠一縣係盤查要口凡鹽船經過每引一封尚有規禮三兩家人書辦亦有九錢八錢不等經臣飭查已據現任知縣陳本自認情愿將伊任內所收之銀立限解繳充公臣因實係從前未盡之流弊已經飭禁容臣另摺奏

聞請

旨此外似屬兢兢守法又商人辦課備價不能折引等語臣到任後查各埠商人竟有完課六七年之久

尚未拆引運鹽者臣不解其故當即咨商前督臣孔毓珣據云四年以前舊引俱係商人完課之後或因場鹽不敷或因該商無力措辦鹽價以致積而不銷等語此即臣前奏鹽政流弊之第一條也經臣具摺奏明業蒙

皇上軫恤商艱准其三年帶拆矣又當道掛欠鹽價可以行鹽等語臣查完課繳價而後運鹽此拆引之舊例也今各商中竟有雖完引課不繳鹽價即領

鹽銷賣賣出之銀又復那完引課或稍完鹽價復領新鹽以致輾轉掛欠年復一年遂成積欠此即臣前奏鹽政流弊之第二條也實係商欠並非當道掛欠臣已確查欠數於查明鹽務帑羨不清等事

奏明勒限一年清楚如限滿不完另議

題請分賠矣又張天爵陸曾李續祖積引等語臣查三案積引賣抵帑項完結已久實非近年之事臣

細查密摺內有全無影響者有久已禁革者有因小及大者有年遠事湮者誠如

皇上聖鑒大抵浮詞無稽持論太過似非公確之奏耳
茲臣畧悉鹽務情形復加確訪謹據實回

奏所有

硃批原發密摺一併恭繳謹

奏

前經批諭原非公確之論今覽所奏甚明朕洞悉無疑

矣至鈔關稅務全賴地方大吏秉公協助方無掣肘之虞向日監督每被督撫刁難勒索此種陋習朕所悉知近聞傅泰與祖秉圭不睦天下未有公而不和之理二



有一非汝宜從中調處須令不致牴牾方於國事

慎勿岐視密之

硃批諭旨卷二百十四之二



總校官庶吉士臣侍朝

校對官編修臣馬啟泰

謄錄監生臣吳向仁

欽定四庫全書叢要

史部

硃批諭旨卷二百十四之三

詳校官編修臣繆晉

欽定四庫全書薈要卷八千二百二

史部

硃批諭旨卷二百十四之三

硃批郝玉麟奏摺

雍正八年正月二十四日廣東總督臣郝玉麟謹

奏為鹽政流弊仰祈

睿鑒事竊臣前奏謹陳兩廣鹽政事摺內荷蒙

硃批諭旨且守成規辦理不必造次更張臣跪讀之下

仰見我

聖主天地為心愛民恤商之至意臣今蒞任半載悉心
訪查鹽政流弊極多實不能一時剔除臣謹遵

聖諭緩緩次第整理而其間相沿流弊既有礙於鹽政
又復累及商民徒為官吏中飽者臣不敢因循瞻
顧有負

殊恩自取罪戾如鹽商行鹽地方在官不得多方掣肘
勒索商人在商亦不得假引行私高價病民經臣
嚴行飭禁已據各府州縣申報遵依禁革在案詎

有廣州府屬之清遠縣係鹽艘必由之要口該縣
藉盤詰私鹽驗看程引名色凡鹽船經過每引一
封知縣得規禮銀三兩家人九錢書辦八錢此等
陋弊本應露章叅揭臣仰體

聖主寬大洪慈姑念流弊已久除一面示禁外隨行運
司確查去後據該司詳據清遠縣知縣陳本覆稱
此項陋規實係相沿日久並非抑勒今奉飭查遵
即禁革情願將任內收過各商引規銀一千三百

三十五兩五錢出具認限解繳道庫不敢絲毫隱匿等語臣復加確訪而該縣一奉行查即據實開報可否寬其已往勵其後效出自

既係

相沿日久應予寬宥

聖恩又查得潮州府屬大埔縣有魚酒稅銀一項並非額設亦無解報經臣飭行運司查據該縣知縣吳車泰覆稱埔民喜食魚酒亦緣價賤但因有礙引鹽魚客情願納稅幫貼引課每年多寡實無定數自雍正五年十一月到任起至七年七月奉查止

共收過魚鹵稅錢一千八百二十餘千計值銀一
千九百餘兩實係歷來相沿流弊今情願立限解
繳道庫等語臣已飭該縣每年儘收儘解幫引
課餘者歸入東省埠羨項下

題報此項鹵稅該縣奉查不諱可否併寬已往統出
亦如前論
聖恩臣查清遠引規有累於商并礙於課自應永禁大

埔鹵稅魚客情愿又便於民應聽照行所有兩縣
認繳銀共三千三百餘兩容臣照催完日

題報歸入餉課項下再從前收取各官本應查究俯
念事既久遠人已去任可否

恩准寬免并應存應革之處臣冒昧

奏請統祈

皇上批示遵行謹

奏

治粵之本不在區區增益課羨為務除弊猶可切勿與
民爭利能令吏畏民懷之後類此等事片紙申飭無不

聽從也今於地方德意未孚官民尚未悉汝心行遽然計較瑣細安望其畏與懷耶誌之汝等封疆大吏於斯曷可不慎至若他省則又當一論所以云因地制宜因人設教屬員中過者裁之不及者進之先之以訓誡繼之以激揚無心之誤恕之以寬既往有意之愆懲之以戒將來誠能如此未有不感服而畏懼者果皆感且畏矣則優者加勉劣者思奮何廢不興何政不舉若徒於案件上逐條逐款一一清釐殊失提綱挈領之道亦恐

未必有如許精神力量將見此事方結彼案又起不勝其煩必至厭倦而後已究竟於吏治民生毫無裨益也從來有治人無治法地方得人始能就理汝於用人一節其勉之哉

同日又

奏為奏

聞恭辦楠木黎民急公情形仰祈

睿鑒事竊照粵省奉行採辦楠木一千一百根塊臣於

到任後即備查卷案親加挑選將合式楠木敬謹
收貯俟餘木辦全之日一併解送外至於未經採
辦之楠木臣即檄行各地方官上緊採辦續據西
寧新興陽江高要等縣具報尋覓楠木株數候行
查勘等語臣隨飛飭採辦楠木之廣南韶道李可
淳星往確勘務須合式欽遵

諭旨明白曉諭各該地方俱照時價公平購買運送赴
廠以憑親驗又據布政司王士俊詳據瓊州府知

府宗思聖報稱查得儋州黎岐地方產有油楠其質堅而滋潤經久不裂當即遵

旨曉諭化誨照依時價公平購買黎人聽聞之下歡忻鼓舞踴躍急公各崗長黎人等公同開山採備其已修整成料并尚未修整者通共五百餘根塊臣思黎人遠居海外一間採辦歡悅爭先仰見

聖德廣被海隅黎夷咸知尊

君親上之大義臣隨行該府作何獎賞以示鼓勵速覆

去後續據宗思聖報稱所有採伐在山楠木正虞
運送費重於九月初九初十兩日大雨得有大水
楠木悉已出山生黎人等咸驚竒異口稱

萬歲洪福大雨隨時而沛合掌對

天叩首歡忻鼓舞有生黎數十村寨情愿歸入版圖同沾
聖化卑府目擊輿情不敢阻抑統俟查明另行詳報等
語本年正月初七日宗思聖來肇臣當即囑令該
府務必加意撫綏并會同撫臣傅泰備給銀兩布

足等物即著宗思聖分賞黎夷宣揚

帝德懷柔之至意并撥發船隻將瓊州府已辦楠木裝
運到廠催令李可淳速將西寧等縣所報尋覓楠
木確加查勘果否合式可用解送選驗仍行多方
覓購務期足數外所有臣恭辦楠木緣由以及黎
民急公情形理合具摺奏

聞謹

奏

黎民急公情形欣悅覽之所以百凡宜先本而後末試
觀滇黔諸務之能就緒者蓋緣本立之所致也假若風
習未端營伍未整吏不畏民不懷將不思報國兵不肯
用命而欲期事之集效之臻曷可得哉一切措施寧緩
毋急諺云急行無好步緩事待人不遺後悔不得其人
好事翻成誤舉大率如此可以類推第一要著務令文
武屬員心悅誠服然此非機謀權術之所能得惟率以
公忠孚以誠信而後方能感動其心也勉之

同日又

奏為

聖德光昭卿雲遠見謹據輿情稟請

題達事雍正八年正月初七日據潮州府揭陽縣稟
稱雍正七年十二月二十二日辰時卑職見東方
曉日初昇有彩雲數十層近日青紅黃紫無不具
備非霧非烟如錦如繡晶光四射輝映經時其時
署外里民舖戶踴躍歡呼共祝

聖天子萬壽無疆隨據闔邑紳士商民人等具呈到縣
理合繪圖具稟轉請具題以光

聖治以慰輿情等因到臣臣思粵東濱海之區荷蒙我
皇上大化宏敷厚生正德比年豐稔時和民安物阜月
令正值嘉平慶雲現於揭邑是皆

聖主孝治光昭之所致臣工黎庶無不仰戴

天庥歡呼踴躍今據該縣具詳人民目覩歡頌情形呈
請題達又據分防揭陽縣遊擊呈報前來臣不敢

壅於上

間除行司查覆會疏具

題外謹此繕摺奏

聞伏乞

睿鑒謹

奏

比年以來各省屢有卿雲現瑞之奏朕深疑之

同日又

奏為據實奏明事竊臣案查雍正七年十一月十七日准提臣王紹緒咨稱十一月初八日據惠州協副將鄂鼎呈稱卑職近因冒沾潮濕染成瘡證惠州乃屬要地非病員所能料理相應呈請察核轉咨准

題休致當經委員驗看取具親供印甘各結移咨前來臣復委員驗看正在備叙疏稿移會提臣接准部咨奉

旨福州副都統員缺著鄂鼎補授臣欽遵即行知照并
調赴肇慶親驗去後續據鄂鼎呈報卑職因病呈
請休致後延醫調治重服藥劑日漸輕減今幸全
愈理合遵檄赴驗隨於本年正月初二日到肇臣
看鄂鼎行走如舊惟臉面瘦減委係初愈形狀伏
讀雍正五年

上諭外官告病督撫查明確實具題令其回籍調治痊
可有情願起用者於本籍起文赴部引見仍以原缺

補用欽遵在案今鄂鼐始因患病請休今病既痊可
自應遵

旨令其前赴新任除現在催令交代起程外臣查鄂鼐
履歷內開年六十歲雍正三年二月輪班引

見今已過三年應否令其進京引

見伏候

聖旨敕遵臣謹據實奏明伏乞

睿鑒謹

奏

鄂鼐已經陞授為副都統乃代為奏請引見大錯矣況既令其交代赴任又欲令其進京何顛倒至於此耶

同日又

奏為遵

旨奏

聞事竊臣於上年六月初五日抵貴州督臣鄂爾泰為訪問廣東提臣王紹緒果否勝任之處密傳

諭旨令臣到粵留心訪問試看如有不勝任處著臣奏
聞欽此欽遵臣到任半載以來留心密訪提臣王紹
緒馭兵嚴明軍伍整肅其辦理通省營伍事件亦
無遺誤至題補水陸員弁無不慎重選擇奉職洵
屬勤謹臣又訪聞該提臣自蒙
皇上訓誡之後感激

聖恩益加奮勵臣再當不時勸勉務期共竭公忠以報
聖主知遇隆恩倘或改絃易轍臣訪聞的確即當奏

聞斷斷不敢徇隱為此據實回

奏伏乞

睿鑒謹

奏

據奏如此朕省却幾許籌度矣仍竭力勸勉之

同日又

奏為欽奉

上諭事本年正月初八日有奉

旨補授惠州協副將繆宏抵肇隨到臣署云有

聖旨臣即跪聽宣傳據稱雍正七年十一月二十六日

繆宏蒙

皇上召見養心殿面奉

上諭聞得雍正二年間有四人勒鞋棕帽口稱王府差

此語係出於曾靜之口

人前往廣東公幹一路氣勢甚雄相貌亦克惡此非

安分之人恐到廣東布散流言愚民無知被其鼓惑

大為風俗人心之害爾傳旨與督撫著用心密訪此

項人或尚在廣東若有踪跡根究務必訪獲其人如
曾靜張熙之流言乃出於發遣廣西人犯之口幸而
發覺早所以不難追問造言之人但亦不必招搖只
留心暗訪若得其一二人亦好又聞廣東火耗米折
俱重誠恐不便於民朕御極以來宵旰憂勤無刻不
以民生為念即用人行政亦惟期有益於民生至維
正之供不得不取之於民其火耗一切亦當定為畫
一之制庶無累於民間若一任有司輕重必有重耗

殃民者甚非朕愛養元元至意又聞沿海窮民以漁
為生每出海捕魚俱於鹽埠領票名曰乾標回水納
銀名曰幫餉相習已久皆出情願今聞鹽埠欲避乾
標之名令漁船實在領鹽出口按船計數希圖多銷
恐不便於窮民為督撫者此等處當細心體查務得
其平使民生樂業庶不辜朕之任用一省事務全賴
督撫公忠體國同心共濟方於地方有益且一省事
歸一轍朕亦好辦理若各存意見將一省事分為兩

途朕從何辦理如孔毓珣楊文乾當時兩人雖無參奏形跡各人意見不同朕所以一同調來引見當引見時朕曉以大義反覆開導彼二人皆感激流涕誓願同心報國即回任後聞得伊等果然交往似乎相和邊海重地督撫相和是以朕心稍安不意楊文乾纔故孔毓珣盡變其所為當時楊文乾所行若非伊身為總督豈不能救正於生前楊文乾所行若是又豈可更變於死後人在即順之是以國事作人情可

乎朕因此鄙薄其為人前日孔毓珣引見時朕面斥其非伊惟有叩首認罪而已是伊之一生名節俱敗於此爾傳旨與督撫各存公忠為國之心公則無有不和即意見或稍有不同必不致大相迥別要知所辦者國事當以國事為重自然合而為一國以民為本凡有便於民生者商酌奏請施行伊等身為大吏當仰體朕心宣揚德意使邊海小民盡知尊君親上之義人心淳厚風俗丕變方不愧封疆之重寄若悠

忽從事必致廢弛豈不辜負朕之任用爾將朕旨傳諭總督巡撫知之欽此欽遵臣恭聆

聖訓益凜咫尺

天威所有應查應禁事件臣現在悉心逐一辦理統客次第具奏外臣惟有與署撫臣傅泰矢公矢慎和衷相濟殫竭忠忱仰報

高厚於萬一耳所有欽奉

上諭緣由合先繕摺

奏覆伏乞

睿鑒謹

奏

覽繆宏所述之旨有是者有謬誤者此亦無大關係處
朕因伊赴粵之便偶然而諭令其告汝若係緊要諭旨
自當特頒豈有命汝屬員口傳之理所奏知道了

雍正八年三月十一日廣東總督臣郝玉麟謹

奏為欽遵

諭旨事本年正月十三日臣標把總齎捧

硃批奏摺回肇臣跪讀

諭旨荷蒙我

皇上指示為治端本之要廣東人員偏黨之習但照楊
文乾辦理事事與布政使王士俊商酌欽此伏查東
省人員結黨一事臣到任後果聞人言臣因駐劄
肇慶司道各員駐劄省城以及各府地方并有奉
差未竣者會面日少不曾深切談論其居心行事

一時未能備悉是以未敢遽行入

告每於辦理之事留心查勘如王士俊才具練達辦事
精明屬員之中俱不能及惟心術屬於隱微臣實
不能看透未免疑似之間茲於二月初三日查勘
圍基到省會商一切公事王士俊不時前來事事
相商臣察其言論推其居心委屬明達有本之人
誠如

聖主明鑒秋毫不爽所論諸事與臣意見多相符合且

深知楊文乾之立志存心臣恪遵

聖諭事事與之相商辦理期其始終勿渝共圖報效仰

副

主知其題帶人員到粵之日臣當密行誡諭必不致被
人詐誘入黨再臣密訪方願瑛實係反覆小人其
狡詐情形近日粵省臣民已頗知覺並無代為稱
冤者若有其人臣查明必據實奏

聞決不敢容隱再奉

硃批令臣試看開復新任副將繆宏容臣詳加試看另
行奏

聞又蒙

敕臣留心訪察道員王璠并

諭臣密問傅泰

皇上硃批數次之

諭旨與傅泰之奏陶正中于其珣如何之處傅泰俱一
一向臣說知敬聽之下仰見我

皇上察吏安民之至意臣仰沐

天恩敢不悉心訪察諄切訓勉務期各員盡除積習以

圖報效容臣一一訪實另行奏

聞外所有欽遵

諭旨緣由理合恭摺具

奏伏乞

睿鑒謹

奏

覽奏俱悉勉力效法鄂爾泰更務言行相符可也

同日又

奏為恭報續獲海洋盜首事竊臣前奏拏獲巨盜李
奕揚等并供出積盜陳大樂王亞七梁國柱等各
緣由一摺奉有

硃批臣跪讀之下荷蒙我

皇上訓勉周詳彌深兢惕不敢稍懈遵即飭行按察司
研訊各犯哨聚年月嚴緝逸盜取具確供詳報臣

密訪得陳大樂等俱係積年劇盜潛聚於北峯黃陽各山抽剝搶刦為害地方隨飭委廣海寨守備馮元密行緝拏去後於上年十一月內據恩平縣知縣姚孔鐸已將盜首王亞七拏獲茲於本年三月初五日據廣海寨遊擊報稱據守備馮元呈報二月二十四日據線人陳已生探聽陳大樂同夥四人駕船一隻潛匿漕冲深灣隨帶兵前往擒拏一人跳水逃竄三人上岸奔逃守備督兵追殺當

獲盜夥三人一名陳大樂一名余文禮一名李蘭
罩搜奪各器械并賊照帖一紙圖書等件外獲賊
船一隻又據陳大樂供出夥黨大旗張亞八并跳
水逃走賊黨混名陽江猪即遣撥目兵分頭追擒
又據線人李雄等密稟案內賊首梁國柱潛匿新
會古兜山隨撥外委千把胡廷佐等前去緝拏於
本月二十五日拏獲梁國柱並據各兵在腰古山
口卡及龜石地方拏獲陽江猪本名李亞三大旗

張亞八該備親自押解前來臣即當堂研審據陳大樂等供認先前在北峯山黃梁都古兜山地方同夥伴做歹事有十來年了抽剝船隻銀錢行劫商人貨物原有多遭事主姓名實不記得等語除押交按察司吊併先獲各犯細加確審究明在山哨聚幾年行劫次數另行具

奏查此案守備馮元實心緝盜殊屬可嘉并兵奮勇效力臣即分別當堂獎賞以示鼓勵一面勒緝餘

黨務獲并究外所有續獲劇盜緣由合先奏

聞再照新會縣屬之北峯南峯二山界連新寧恩平開平各縣地方緊連外海山場極大樹木最多自來無業窮民就山砍伐樹木開廠燒炭以為生活因有炭廠以致匪類自霸為保廠哨聚多人恣肆不法今欲盡行驅逐實於營業小民未便臣細加酌議查該山向有柴場一汛從前於香山新會廣海三營每年輪撥千把一員帶兵一百名前往駐防

繼因營房倒塌廢弛已久實無汛兵防守以致姦
匪得以托足肆無忌憚今臣現飭文武各官親行
查勘該汛營房需用工料實數即為發價修整照
依向例輪撥官兵駐防彈壓庶姦匪不得潛藏商
民俱各寧謐矣事關地方情形一併陳

奏伏乞

皇上睿鑒謹

奏

既獲劇盜復撥汛防地方自可無虞朕嘉是覽之効力
員弁仍當破格獎賞以示鼓勵

同日又

奏為恭請

聖裁事竊廣東按察使樓儼信用革役蕭鳴一案經臣
奏明奉

旨樓儼必有失於覺察之處著解任來京其按察使員
缺著廣東鹽運使黃文煒署理如能勝任著督撫具

題請旨廣東鹽運使員缺郝玉麟等於道府內揀選
具題蠹役蕭鳴強橫肆行目無法紀甚屬可惡著該
撫嚴審定擬具奏該部知道欽此仰見我

皇上於按察使鹽運使二缺慎重周詳務使人地相宜
之至意查黃文煒蒙

聖恩署理按察使事務聽斷詳明辦事努力惟是署篆
無幾未敢草率入

告容臣等再加詳察明白果否勝任另行具題請

旨其廣東鹽運使一缺辦理五省鹽政所關最重蒙
皇上命臣等於道府內揀選敢不矢公矢慎仰副

聖懷臣等備查道員或分巡海疆董修戰艦或督徵稅
糧稽查驛站或現任要缺或人地不甚相宜均未
便調補謹於知府內選有惠州府知府馮元方瓊
州府知府宗思聖才具俱屬練達辦事亦各勤慎
均堪膺監司之任此二員布政使王士俊亦力言
其可臣郝玉麟會同署撫臣傅泰已另疏恭請

皇上欽定一員則要缺得人鹽政實有裨益矣倘蒙
聖恩俞允所遺員缺均屬緊要容臣等或於奉

旨發往候補人員或於人地相宜員內揀選另行具

題請

旨遵行伏乞

皇上睿鑒施行謹

奏

具題到日有旨

廣東總督臣郝王麟署巡撫臣傅泰謹

奏為瀝陳辦銅下情懇祈亟賜籌畫事雍正八年二月十八日據廣州府知府吳騫等會詳稱竊查廣東上下兩運銅斤每年額辦五十五萬四千三百九十九斤本省並無開採近省又不產銅向來東洋銅斤來粵發賣近來東洋洋船俱進江浙海關並無片銅至粵是以康熙六十年准部文行令江浙二省分辦而江南承認獨辦五省之銅迨署江

蘇撫院何天培以洋銅出產不敷奏請認辦三省

而福建廣東於雍正三年仍舊採辦是時廣東鋪

家尚有存貯銅斤可買繼後歷年承辦之員每罹

叅罰俱赴雲南買運萬里程途往回耽擱必經七

八月始到廣東若從廣西以至滇粵接壤之百色

春夏多瘴人不能行必俟霜降後方可往來江河

險阻夫馬舟船之費不可勝計買回毛銅又須鎔

化成條工匠炭火兼之折耗在在皆須賠墊部價

銅斤每擔一十四兩五錢加入一切雜費儘力節省每擔必需十八九兩至二十兩不等每運賠墊之數不下一萬餘兩且自萬里買回勢不能依限解赴處分即至報效心殷補救無術種種下情伏望詳察亟賜裁畫庶下吏得以竭蹶辦理等情臣等當即執行布政司妥議去後隨據該司詳議前來臣等覆查銅斤關係鼓鑄承辦之員自當竭力趕辦以濟公務但採辦有難易之分購買有遠近

之別現在目擊情形誠恐誤公臣等同布政司王士俊詳細斟酌查部定銅價每斤一錢四分五釐止可就近採買今遠赴買運實屬不敷可否仰懇皇上每年於部價之外

恩賞協貼銀一萬兩以為上下兩運採買不敷之用此銀或於關羨鹽羨稅羨內支用臣等未敢擅便理合恭請

聖裁至粵東距滇隔越三省買運銅斤往返動經半年

有餘勢不能依限起運仰籲

聖恩俯念粵東去滇遙遠與江浙等省就近採買者有
間

敕命部臣定議將粵東辦銅各員初叅准其展限倘展
限既滿之後起運遲延即照初叅例議處稍寬數
月之期俾得竭力報效感戴

皇仁於億萬斯年矣又臣等據各府稟稱銅斤自滇採
買轉復運至粵省始行鎔化十足銅條又自粵省

起運進京往往姦匠於鎔銷之時暗中攙假銅色
不足部驗仍有折耗轉輾周折更稽時日又多賠
補若竟從滇起運進京設有銅色不足照例賠補
可免重複虧折等語臣等細思此言似亦近理懇
祈

皇上併

敕部臣議覆為此合詞繕摺具

奏伏乞

皇上睿鑒施行謹

奏

所奏已交該部詳議矣據此情形辦銅一事於粵東殊不相宜候部議覆到日有旨

雍正八年三月二十六日廣東總督臣郝玉麟署
巡撫臣傅泰謹

奏為謹遵

諭旨會議營制事宜仰祈

睿鑒事雍正八年正月二十一日接到大學士公馬爾賽等寄字內開欽奉

上諭著將王紹緒所奏四摺及怡親王等原議孔毓珣後議爾等鈔錄寄信交與廣東總督郝玉麟署巡撫傅泰秉公悉心詳議具奏欽此遵

旨寄信前來等因欽此臣郝玉麟隨即赴省會同傅泰細閱各摺內事由看得粵省營制扼險據要聲勢聯絡相沿已久原未便輕議紛更是以怡親王等

議將提臣王紹緒原奏更改營制事宜令臣等再行詳確定議臣等謹按地方形勢審度時宜詳加諮詢悉心籌畫固不敢急遽紛更以滋事亦不敢因循苟且以塞責伏查粵東僻處海隅荷蒙

聖朝休養生息近來生聚日繁商賈輻輳倍於往昔其間營制似宜隨時酌改量為裒益庶緩急得宜輕重合度邊疆鞏固永享敕寧謹將提臣王紹緒原奏怡親王等前議及河道總督臣孔毓珣後議秉

公斟酌分別應行應止併臣等因地相度芻蕘管見另繕清摺覆

奏恭候

皇上採擇謹

奏

汝等此次所議甚屬詳悉妥協殊非草率塞責之論朕披閱之下深為嘉悅但事關更改營制重務候命廷臣再加確議奏覆有旨

雍正八年五月十一日廣東總督臣郝玉麟謹

奏為奏

聞事本年四月初十日據瓊州鎮臣李順呈稱雍正八年三月十八日恭遇

聖祖仁皇帝萬壽聖節文武各官共向

龍亭公所恭申釐祝時當寅末卯初見東方祥雲朗現
瑞氣高騰五彩繽紛一天金碧紅輪堆燦光華迥
異是日正值操期官弁目兵齊集由卯歷辰共瞻

良父士民人等環睹如林踴躍歡呼萬聲齊慶欽
惟我

皇上敬

天法

祖九州永享昇平

旰食宵衣萬邦咸臻郅治而且蠲租免賦閭閻浹洽
肌是以川嶽星辰宇宙遍彰祥瑞顧茲瓊島天末
孤懸內而黎岐蠻獠近多向化歸誠外而海口港

門更復波恬浪息是皆

聖祖在天之神靈昭鑒

皇上孝思之無斁故爾感應海濱垂示靈異理合呈請
題達等情到臣又據雷瓊道王璠瓊州府知府宗思
聖瓊山縣知縣楊先椿各具詳報并轉據紳士耆
老里民等呈稟前來臣不敢壅於

上聞除行司查詳會疏另

題外謹先繕摺奏

聞伏乞

皇上睿鑒謹

奏

慶雲適現於此日非尋常可比應具疏題奏

同日又

奏為密行奏

聞事竊照廣東左翼鎮總兵官員缺荷蒙

皇上將福建延平協副將李維揚補授該鎮於本年三

月二十四日到任後隨至廣州省城見臣看李

維揚年止四十五六聽其言語雖還明白觀其舉
動不甚強健據稱足有風疾有時舉發步履微蹇
等語臣查左翼一鎮兼轄副將四員大小十六營
所轄地方有虎門澳門各險要洋面為省城之屏
藩山海之重鎮最關緊要必須精明強幹才畧兼
優始能勝任但該鎮甫經任事其辦事之處臣尚
未確知不能懸定第察其舉動神情未免遲鈍應

再試看能否勝任另行具

奏今據臣所見情形理合據實奏

聞伏乞

睿鑒謹

奏

若確知有不勝任處即當一面委署一面奏聞何乃游
移其詞往返摺奏不顧貽誤重鎮耶

同日又

奏為據詳奏

聞事本年五月初五日據陽春縣詳報四月二十九日
歲考童生有現任左翼鎮姪孫李國壁與該縣禮
房買卷換錢爭論將盛水盅拍碎手有微傷誣指
該房口咬率領李國璉等多人蜂擁縣堂毆打書
辦該縣隨將禮房重責滿堂生童聽其指揮目無
縣令竟欲自己行杖儒學巡檢屢勸不從將及二
更衆方闕然而出至次日清晨點名入場有童生

汪武緯為攻冒籍將歐光啓打傷縣門槩行打碎
復行罷考該縣宣示

朝廷大典律例明條各童生始行赴考訖臣據詳當即
批飭布按二司嚴提確審啟釁毀門及罷考各實
情嚴行究擬去後又於本月初十日據封川縣詳
稱奉行歲試文武童生需用卷結卑職令紙戶照
舊備刷成本令各童買交禮房彌封送印各童自
買制刷者四百本有零其餘任造不堪爛紙卑職

恐將來奉吊原卷致干駁詰因將不堪之卷退出
乃有藐法惡徒歐朝日梁性安等見其不用已卷
於四月二十八日下午晚公然進縣擒毆禮房書辦
鬧至宅門拍案譁噪卑職隨即出堂將禮書鎖責
再三慰諭勉強散出似此逞兇惡棍相應詳請嚴
究等情據此臣亦批飭該司等秉公察審毋枉毋
縱分別議詳會核外理合據實奏

聞伏乞

皇上睿鑒謹

奏

此事須援引豫省之例將尤甚者一二人置之重典庶
幾革除陋習若照常法薄懲恐更滋長刁風但生殺大
事所關甚重亦不可因奉朕一時之諭草率隨順而行
也

同日又

奏為恭謝

天恩事本年四月初八日臣標千總齎捧

硃批奏摺到粵蒙

皇上賜臣克食二匝臣跪迎至署恭設香案望

闕叩頭祇受訖伏念臣知識短淺報效心殷措施愚拙

仰荷

聖主誨勉諄諄一應政事無不

指示詳明

恩予造就臣惟朝夕佩誦

聖訓欽遵辦理務期悉心盡力仰報

主恩於萬一耳臣謹具摺奏

謝伏乞

睿鑒謹

奏

覽奏已悉但時刻毋忘鄂爾泰之居官為人并伊所勸勉之言保汝一生用之不盡斷不至於大錯若遺忘一分即有一分之損縱目下不覺其損將來必為大害汝

勉為之

同日又

奏為欽奉

諭旨事竊臣前覆奏密陳痼弊一摺奉到

硃批臣跪讀

聖諭伏念人臣事

君如子之事父凡屬同官即如昆季理當同心戮力始

無廛

君父之懷臣本年因會商公務在省兩月有餘見傅泰
與祖秉圭雖無參商形迹而言語似各有芥蒂之
處臣欽遵

密旨不敢宣傳

聖諭以臣已意互相規勸傅泰祖秉圭聞臣之言各有
慚愧悔過之心至稅務係

朝廷公事臣前經面諭各關口地方文武官弁協同巡
查慎勿歧視并復檄行遵照在案臣斷不敢存彼

此之見今後更當秉公照看仰副

皇上誨勉之至意理合回

奏伏乞

睿鑒謹

奏

傅泰中平才具非宜粵撫之人已降旨調回京矣

同日又

奏為奏

聞事竊粵東各屬銀銅錫廠奉文封禁臣到任後復檄

飭地方文武嚴加防範上年冬間歷據肇慶府屬

開建縣文武員弁稟稱該縣所屬之芋莢山在東

西兩粵交界之處兩省共此一山俱產有金砂粵

西現在委官開採有等游手無藉之徒遂覬覦粵

東界內礦砂每每暗行偷竊卑職等雖不時各差

兵役巡查究恐不能禁絕相應稟報各等情臣隨

酌撥弁兵協同分路巡查去後本年二月內臣赴

省會商公事隨與撫臣傅泰布政使王士俊言及
此事共相商酌委員前往確勘情形並驗礦砂虛
實續據該委員稟稱於四月初二日到開建芋茨
山細加查看果有礦砂隨雇覓本地村民開一壠
口自初三日起至本月二十七日止將採出礦砂
舂得淨金一百餘兩所費工銀二百餘兩該地方
因有官兵巡查匪徒不敢竊取等語據此是所驗
礦砂委有成效非他廠可比致匪類有偷竊之念

巡防益須嚴密臣即飭將開試之壠口封閉所有
春驗礦金解交藩庫并差弁兵看守去訖至茅茨
山金砂礦廠應否開採容臣遵

旨會同鄂爾泰將封川開建二縣應隸東西二省何處
管理之處悉心定議具

題外另行奏請候

旨遵行謹將查驗礦砂情形據實奏

聞謹

奏

總之粵東開採一事萬不可行惟宜嚴禁稍若奉行不力即為溺職也朕頗風聞文官每欲借此圖利武員因不便破面查拏此語未審確否朕尚另有諭旨頒發且粵省文武不和實為第一惡習汝膺兼轄之責如不秉公罰懲此弊何由革除統率閩省者惟汝一人咎將誰卸耶留心誠飭務令調協勉之

雍正八年八月二十六日廣東總督臣郝玉麟謹

奏為遵

旨覆奏事竊照廣東惠州協副將繆宏臣前奉

硃批諭旨令臣留心試用俟有真知灼見時具奏以聞

欽此欽遵臣看繆宏辦事好才具頗優營伍事務

委能留心整飭實武臣中難得之員惟是為人稍

覺偏執凡接待文僚先存彼此兩途之見其未經

履任之先已見於言表迨到任後曾來兩次見臣

臣已面為訓誡但察其才能歷練實屬去得近蒙

天恩調補江寧城守副將仰見

皇上明並日月無微不燭臣謹遵

旨據實覆

奏伏乞

睿鑒謹

奏

朕灼見此人在粵無益所以調補別省試看

同日又

奏為奏

聞事竊查觀風整俗使臣焦祈年巡察各屬地方於本年七月二十一日登舟渡海前赴瓊州寄橈海口候潮開行適於是夜二更陡起狂風波濤洶湧延至次日黎明所坐之船被風推至博漲礮臺邊擱於石上不能傍岸浪掀石撞船已破碎時經海安營遊擊錢志漢督令弁目周天方華等浮水力救隨即請起

敕印并將使臣甫經扶掖離船而船已擊爛仰賴

皇上洪福得於險迫之中尚獲保全所有隨從人等亦
俱無恙臣據協管具報星即遣人前往使臣處問
慰并行查奮勇拯救使臣之目兵到日以便獎賞
以示鼓勵除擊碎船隻并淹沒兵丁顏顯郭必進
曹興等三名容臣確查另疏

題報外所有使臣渡海被水緣由理合奏

聞謹

奏

覽奏知道了查明奮力拯救兵丁破格厚加賞賚可也

同日又

奏為奏明事竊臣前奏查驗礦砂情形一摺奉有

硃批臣跪讀之下惶悚無地伏念臣以庸愚仰荷

聖主洪恩由提督擢授總督任大責重圖報為難幸蒙
皇上指示殷殷俾得有所遵循且屢蒙

訓旨令臣以雲貴廣西督臣鄂爾泰為法夫以臣之才

識固不敢望鄂爾泰之居心行事臣在滇日久實
知之最詳服之最深如用人則隨才器使遇事則
集思廣益大公為懷文武不分彼此至誠相感上
下聯為一心不避嫌怨無隱無欺凡有膏澤下逮
之處務必宣布

天恩遇其栽培薦拔之人從不矜伐已德此皆鄂爾泰
居心行事之要領臣實欲是則是倣矢慎矢公不
果肯如此朕復何憂實力勉之
敢稍渝者也粵東不便開採一事臣上年到任後

屢飭查禁前因開建縣之芋茨山為東西兩粵交界既經查試有驗不敢不為奏

聞然亦未敢遽議開採至廣東文武間從前原有不和之惡習自臣到任以來時加勸誡現今撫臣提臣以及司道各鎮之間亦仰遵

聖訓罔敢挾私廢公茲奉

硃批勗勉臣惟有欽遵

諭旨將一切礦崗不時嚴行查禁并通檄文武各官和

東辦事如有挾私不和臣即據實嚴叅請
旨所有遵奉

硃批緣由理合恭摺


奏明伏乞

皇上睿鑒謹

奏

此奏朕嘉悅覽之

硃批諭旨卷二百十四之三



總校官庶吉士臣侍朝

校對官編修臣馬啟泰

謄錄監生臣吳向仁